

COMISIÓN INFORMATIVA DE COOPERACIÓN, INFRAESTRUTURAS E MEDIO RURAL

ACTA da mencionada comisión informativa, correspondente ao día **20 de setembro de 2023**
Ás 17.43 horas do día 20 de setembro de 2023, reúnese a Comisión Informativa de Cooperación, Infraestruturas e Medio Rural, en sesión ordinaria, na sala de xuntas da Deputación Provincial, coa asistencia dos seguintes deputados e deputadas:

Presidente: D. Luís Menor Pérez

Deputados/as do Grupo Popular:

D. José María Lago Cabo

D.^a Marta Nóvoa Iglesias

D.^a Patricia Torres Madureira

D.^a María Teresa Barge Bello

D. Manuel Seoane Rodríguez

Deputados/as do Grupo Socialista:

D. Álvaro Vila Araújo

D.^a Susana Rodríguez Estévez

D. Aurenitno Alonso Araújo

D.^a Marina Vaz Quintillán

Deputados de Democracia Ourensana:

D. Armando Ojea Bouzo

D. Gonzalo Pérez Jácome

Deputados/as do BNG:

D.^a María José Mangana Guede

D. Bernardo Varela López

Secretario: D. Juan Marquina Fuentes Fuentes

Interventora: D.^a Begoña Álvarez Matos

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- CONSTITUCIÓN DA COMISIÓN.-

De acordo co previsto nos artigos 135 e 138 do ROF, onde se dispón que a válida realización das sesións das comisións informativas require a presenza da maioría absoluta dos compoñentes da comisión, titulares ou suplentes, en primeira convocatoria (e un mínimo de tres membros en segunda convocatoria unha hora máis tarde, e que en todo o non previsto serán de aplicación as disposicións sobre funcionamento do pleno, unha vez constatada a existencia de quórum suficiente, declárase validamente constituída a comisión.

2º.- DACIÓN DE CONTA DO ACORDO DA XUNTA DE GOBERNO DE EXPROPIACIÓN FORZOSA.

Dáse conta do acordo da Xunta de Goberno para expropiación forzosa para execución das obras de acondicionamento e mellora integral na OU-1212 Bande-Portugal, 102/POS/2022, en Lobios.

3º.- MODIFICACIÓN DAS BASES REGULADORAS DO PROGRAMA BENOURENSE PARA O SERVIZO DE AXUDA NO FOGAR BÁSICO PARA O EXERCICIO 2023

O Sr. secretario explica o contido da proposta.

Non se producen intervencións e, por unanimidade, a comisión ditamina favorablemente a adopción, por parte do Pleno, do seguinte acordo:

1º.- Aprobar inicialmente a modificación das bases reguladoras do Programa BenOurense para o servizo de axuda no fogar básico – SAF básico, para o exercicio 2023, no seguinte sentido:

Na base VI.1., onde di:

“1. Pago anticipado a conta da xustificación final:

(...) A xustificación final do programa, na Acción 1, poderá incluír:

- As facturas emitidas pola mercantil prestadora do servizo/subministración de dixitalización á data do 15 de setembro de 2023. (...)”

Debe dicir:

“1. Pago anticipado a conta da xustificación final:

(...) A xustificación final do programa, na Acción 1, poderá incluír:

- As facturas emitidas pola mercantil prestadora do servizo/subministración de dixitalización ata o 30 de novembro de 2023. (...)”

Na base VI.2., onde di:

“2. Xustificación e pago final.

Ata o 15 de setembro de 2023 para a ACCIÓN 1, e ata o 30 de novembro de 2023 para a ACCIÓN 2 (ambas as datas incluídas), as entidades locais beneficiarias poderán presentar a documentación xustificativa da subvención... ”

Debe dicir:

“2. Xustificación e pago final.

Ata o 30 de novembro de 2023 (incluído) para as ACCIÓNS 1 e 2, as entidades locais beneficiarias poderán presentar a documentación xustificativa da subvención... ”

2º.- Someter a trámite de información pública, mediante anuncio publicado no Boletín Oficial da Provincia de Ourense, a modificación das bases inicialmente aprobada polo prazo de 10 días hábiles, conforme co establecido no artigo 10 da Ordenanza xeral de subvencións da Deputación Provincial de Ourense, durante os cales as entidades interesadas poderán formular as alegacións ou suxestións que consideren oportunas, que serán resoltas expresamente polo Pleno. No caso de non formularse alegacións en prazo, entenderase elevado a definitivo o acordo de aprobación inicial.

4º.- CESIÓN DE USO DA SUPERFICIE QUE OCUPA O AERÓDROMO DE ANTELA (10,09 HA) SOBRE DIFERENTES PARCELAS CATASTRAIS

O Sr. secretario explica o contido da proposta.

D. Armando Ojea Bouzo, de DO, manifesta a reserva de voto do seu grupo para o Pleno.

D. Bernardo Varela López, do BNG, intervén para manifestar que está de acordo coa proposta, que entende que se trata dun servizo público moi importante o que alí se presta e que se trata dun bo exemplo de colaboración interadministrativa entre a Xunta e a Deputación, polo que van apoiar a proposta da Presidencia.

D.^a Susana Rodríguez Estévez anuncia a reserva de voto do seu grupo para o Pleno.

Non se producen máis intervencións e co voto favorable do Grupo Popular (6) e do BNG (2) e a abstención do Grupo Socialista (4) e de DO (2), a comisión ditamina favorablemente a adopción, por parte do Pleno, do seguinte acordo:

1º.- Aprobar a cesión á Xunta de Galicia do uso da superficie que ocupa o Aeródromo de Antela (10,09 Ha) sobre as seguintes referencias catastrais:

- 203 m2 da parcela NRC: 32078A177000320000QS
- 35.518 m2 da parcela NRC: 32078A177000340000QU
- 4.582 m2 da parcela NRC: 32078A177000460000QL
- 29.982 m2 da parcela NRC: 32078A177000490000QM
- 17.465 m2 da parcela NRC: 32078A177000500000QT
- 13.150 m2 da parcela NRC: 32078A177000520000QM

A esta cesión seranlle de aplicación as mesmas condicións que figuran no acordo de data 1 de abril de 1997 e na addenda de data 29 de maio de 1997 de cesión dos terreos sobre os que se asenta o Aeródromo de Antela á anterior Consellería de Agricultura, Gandería e Montes da Xunta de Galicia.

2º) Remitirlle á Xunta de Galicia o acordo de cesión adoptado por parte do Pleno, o título de propiedade dos bens e nota simple do rexistro para que proceda a tramitar un expediente de aceptación.

3º) Formalizar o documento administrativo de cesión entre ambas administracións.

5º.- CONVENIO DE COLABORACIÓN ENTRE A DPO E OS CONCELLOS DA PROVINCIA DE MENOS DE 20.000 HABITANTES PARA A POSTA A DISPOSICIÓN DO SOFTWARE NECESARIO PARA DISPOR DUNHA CANLE DE INCIDENCIAS OU DENUNCIAS, INDIVIDUALIZADO PARA CADA UN DELES, QUE CUMpra COS REQUISITOS ESIXIDOS POLA LEI 2/2023, DO 20 DE FEBREIRO, POLA QUE SE REGULA A PROTECCIÓN DAS PERSOAS QUE DENUNCIAN INFRACCIÓNS NORMATIVAS E A LOITA CONTRA A CORRUPCIÓN.

O Sr. secretario explica o contido da proposta.

D. Armando Ojea Bouzo, de DO, di que lle parece boa iniciativa, polo que o seu grupo apoiará a proposta.

D. Bernardo Varela López do BNG, sinala que lle parece tamén unha boa medida da Deputación que algúns xestores de expedientes que se utilizan nos diferentes concellos prestar este servizo, aínda que é dubidoso que reúnan todos os requisitos que esixe a norma, polo que,

ao tratarse de algo obrigatorio por lei e que a Deputación vai poñer a disposición de todos os concellos, van apoiar a proposta.

D. Álvaro Vila Araújo, do Grupo Socialista, indica que se trata dunha obrigaón máis para os concellos, que os concellos pequenos van ter dificultades para a implantación, polo que entende que se trata dunha boa medida da Deputación,

Non se producen máis intervencións e, por unanimidade, a comisión ditamina favorablemente a adopción, por parte do Pleno, do seguinte acordo:

1º. Aprobar o Convenio entre a Deputación de Ourense e os concellos da provincia de menos de 20.000 habitantes para a posta a disposición do software necesario para dispor dunha canle de incidencias ou denuncias, individualizado para cada un deles, que cumpra cos requisitos esixidos pola Lei 2/2023, do 20 de febreiro, pola que se regula a protección das persoas que denuncian infraccións normativas e a loita contra a corrupción, de acordo coas **seguintes cláusulas**:

PRIMEIRA.- Obxecto.

Constitúe o obxecto do presente convenio a regulación das condicións da cooperación e asistencia que presta a Deputación de Ourense aos concellos da provincia de menos de 20.000 habitantes para a posta a disposición do software necesario para dispor dunha canle de incidencias ou denuncias, individualizado para cada un deles, que cumpra cos requisitos esixidos pola Lei 2/2023, do 20 de febreiro, pola que se regula a protección das persoas que denuncian infraccións normativas e a loita contra a corrupción.

SEGUNDA.- Obrigas das partes e procedemento de adhesión.

1. Obrigas da Deputación de Ourense.

A Deputación de Ourense porá a disposición dos concellos que se adhiran, o software para que poidan dispor dunha canle interna que cumpra coas esixencias establecidas pola Lei 2/2023, do 20 de febreiro, pola que se regula a protección das persoas que denuncian infraccións normativas e a loita contra a corrupción.

A Deputación realizará unha formación (cunha duración mínima de dúas horas), para o persoal municipal designado como xestor da respectiva canle.

A Deputación porá a disposición dos concellos os documentos do Sistema Interno de Información, para que poidan adaptalos segundo as características e necesidades de cada concello (Política do SII e procedemento de xestión das comunicacións).

A Deputación procederá á integración das canles municipais nas webs dos respectivos concellos.

2. Obrigas dos concellos.

Os concellos deberán, ademais de aprobar a súa adhesión polo órgano municipal competente (segundo o modelo previsto no anexo I), designar á persoa que será xestora da canle e remitir os datos que sexan requiridos para proceder á integración da canle na web municipal.

3. Procedemento de adhesión.

Os concellos interesados deberán presentar no rexistro xeral electrónico da Deputación de Ourense, a partir do día seguinte ao da publicación do acordo de aprobación do convenio pola Deputación no BOP, a seguinte documentación:

- *Modelo de documento de adhesión (anexo I) debidamente cuberto e asinado polo representante legal.*
- *Certificación do acordo de adhesión e de aprobación do clausulado do convenio, adoptado polo órgano municipal competente, e asinado polo titular da secretaría ou secretaría-intervención municipal.*

TERCEIRA.- Comisión de seguimento.

1. Establécese unha Comisión de Seguimento do convenio, integrada polos seguintes membros:

a.- En representación da Deputación Provincial:

O presidente, ou deputado no que delegue. Corresponderanlle, ademais, as funcións de presidencia da comisión.

b.- En representación do concello:

O/a alcalde/sa, ou concelleiro/a no/na que delegue, que poderá comparecer asistidoa de funcionarios ou técnicos municipais, estes últimos con voz pero sen voto.

As funcións de secretaría da Comisión de Seguimento corresponderanlle ao secretario xeral da Deputación, ou funcionario/a que legalmente o substitúa.

2. A comisión de seguimento terá carácter paritario, correspondéndolle un voto ao concello e un voto á Deputación Provincial.

3. Son funcións da comisión as seguintes:

- a) *Informar de calquera modificación ou novación do presente convenio.*
- b) *Coñecer as propostas, queixas ou suxestións que as partes poidan formularlle ao resto de entidades asinantes.*
- c) *Informar os supostos de resolución do convenio.*
- d) *Interpretar o presente convenio, con carácter executivo, así como resolver as incidencias que poidan xurdir na súa aplicación.*

4. *A Comisión de Seguimento adoptará os seus acordos por unanimidade, dado o seu carácter paritario. En caso de non acadarse a dita unanimidade, deixarase constancia en acta desta circunstancia, dándose por cumprido o trámite de informe da comisión, no caso de que este sexa preceptivo, e podendo, as entidades parte do convenio, exercer as accións xudiciais ou administrativas que consideren oportunas.*

5. *No non previsto no presente convenio, o funcionamento da Comisión de Seguimento rexerese polas normas de funcionamento de órganos colexiados establecidas no título II da Lei 40/2015, de 1 de outubro, de réxime xurídico do sector público.*

CUARTA.- Réxime xurídico.

O presente convenio terá natureza administrativa. A súa revisión en vía xudicial, así como a dos actos e acordos ditados na súa execución ou derivados deste, corresponderalles aos órganos da xurisdición contencioso-administrativa.

QUINTA.- Causas de resolución do convenio. Liquidación.

1. *Serán causas de resolución do convenio as seguintes:*

a) *Polo transcurso do seu prazo de vixencia sen terse acordado a súa prórroga.*

b) *Polo acordo unánime das partes.*

c) *Polo incumprimento das súas obrigas e compromisos por calquera das partes, a pedimento da outra parte. Neste caso, a parte que solicita a resolución deberá notificarlle á outra parte un requirimento para que cumpra as súas obrigas nun prazo determinado. Do requirimento formulado daráselle traslado á comisión de seguimento, para informe. Se transcorrido o prazo indicado no requirimento persistise o incumprimento, a parte que o formulou notificaralle á outra parte a concorrencia da causa de resolución, e entenderase resolto o convenio.*

d) *Por decisión xudicial declaratoria da nulidade do convenio.*

e) *Por calquera outra causa prevista nas leis.*

2. *Producida a resolución do convenio, este entrará en liquidación, que será aprobada pola Deputación Provincial, tralo informe previo da comisión de seguimento. Contra o acto de liquidación procederán os recursos previstos contra os actos administrativos no ordenamento xurídico.*

Na liquidación incluíranse os danos e perdas causados pola resolución, que lle serán imputables á parte que os causase conforme coas regras xerais de responsabilidade contractual.

En todo caso, a liquidación suxeitarase ao previsto no artigo 52 da Lei de réxime xurídico do sector público.

SEXTA.- Vixencia e duración do convenio.

O presente convenio ten efectos desde a súa sinatura, e terá unha duración de catro anos. En calquera momento, antes da finalización deste prazo, os asinantes do convenio poderán acordar unanimemente a súa prórroga por un período de ata catro anos adicionais ou acordar a súa extinción.

SÉTIMA.- Réxime de modificación do convenio.

Calquera modificación do presente convenio requirirá o acordo expreso das partes que o subscriben.

OITAVA.- PUBLICIDADE.

O presente convenio ou o seu acordo de aprobación, será publicado no BOP, na sede electrónica e no portal de transparencia da Deputación, para xeral coñecemento.

2º. Publicar este acordo no BOP, para os efectos oportunos e para o xeral coñecemento.

ANEXO I – MODELO DE DOCUMENTO DE ADHESIÓN

D./D^a _____ na súa condición de alcalde/sa do Concello de _____, e en virtude das facultades que lle confire o artigo 21.1 b) da Lei 7/1985, reguladora das bases do réxime local e demais normativa concordante, actuando en nome e representación do referido concello **DECLARA RESPONSABLEMENTE:**

1º. Que coñece na súa totalidade o vixente Convenio de colaboración entre a Deputación de Ourense e os concellos da provincia de menos de 20.000 habitantes para a posta a disposición do software necesario para dispor dunha canle de incidencias ou denuncias, individualizado para cada un deles, que cumpra cos requisitos esixidos pola Lei 2/2023, do 20 de febreiro,

pola que se regula a protección das persoas que denuncian infraccións normativas e a loita contra a corrupción (en adiante convenio).

2º. Que por acordo adoptado por _____ na data _____, o Concello de _____ aprobou a adhesión do Concello ao Convenio, aprobando expresamente o seu clausulado, e designando como persoa responsable da canle a _____ (*nome, apelidos, DNI, cargo/posto de traballo e medios de contacto*), e como técnico de contacto responsable da web municipal a _____ (*nome, apelidos, DNI, cargo/posto de traballo e medios de contacto*).

SOLICITA: A adhesión do Concello de _____ ao Convenio de colaboración entre a Deputación de Ourense e os concellos da provincia de menos de 20.000 habitantes para a posta a disposición do software necesario para dispor dunha canle de incidencias ou denuncias, individualizado para cada un deles, que cumpra cos requisitos esixidos pola Lei 2/2023, do 20 de febreiro, pola que se regula a protección das persoas que denuncian infraccións normativas e a loita contra a corrupción.

Sinatura

6º.- MOCIÓN DO BNG PARA DEMANDAR A EXECUCIÓN TOTAL DO VIARIO DE CONEXIÓN ENTRE A N-525 E BARROCÁS QUE PERMITA MELLORAR OS ACCESOS AO CHUO E DESCONXESTIONAR AS RÚAS MARCELO MACÍAS E RAMÓN PUGA

D.ª María Xosé Mangana Guede, do BNG, procede a explicar o contido da moción. Insiste na gran importancia que ten esta solución para garantir os accesos ao CHUO e ao mesmo tempo desconxestionar o tráfico nas principais rúa de entrada á cidade.

D. Armando Ojea Bouzo, de DO, indica que, en principio, está de acordo coa formulación abstracta da moción, se ben baixando ao concreto hai que ter en conta o Plan xeral de ordenación municipal do ano 2013, polo que hai que analizar a cuestión con máis detalle. Anuncia a reserva de voto para o Pleno.

D. Álvaro Vila Araújo, do Grupo Socialista, di que, en principio, está de acordo co fondo da cuestión, xa que se trata de garantir mellores accesos ao CHUO, se ben ten certas dúbidas

coas solucións concretas que se formulan, xa que afectan de xeito directo ao Concello de Ourense e á Finca Santa Marina, polo que estamos ante un asunto moi complexo. Manifesta a reserva de voto para o Pleno.

D.^a Patricia Torres Madureira, do Grupo Popular, indica que, evidentemente, todo o que sexa mellorar os accesos ao CHUO lles parece unha boa iniciativa e que pos iso a Xunta de Galicia ordenou a redacción dun proxecto que mellore os ditos accesos. Por isto entenden que é un tema que hai que estudar detidamente, polo que reservan o voto para o Pleno.

Non se producen máis intervencións e co voto favorable do BNG (2) e a abstención do Grupo Popular (6), do Grupo Socialista (4) e de DO (2), a comisión ditamina favorablemente a adopción, por parte do Pleno, do seguinte acordo:

1. A Deputación Provincial de Ourense insta a Xunta de Galiza a impulsar as medidas oportunas para garantir que a futura conexión entre a N-525 e o Complexo Hospitalario de Ourense se realice de maneira integral abrangendo ata o barrio de Barrocás, tal e como está previsto no PXOM de 2013, e que ese viario poida posibilitar o acceso directo dos vehículos ao CHUO e desconxestionando o tráfico tanto de Marcelo Macías como de Ramón Puga, evitando solucións parciais que non resolvan as dificultades de mobilidade existentes.
2. A Deputación de Ourense, como propietario maioritario na finca Santa Mariña, comprométese a por en marcha os mecanismos administrativos necesarios para poder facer realidade esta infraestrutura nos terreos que maioritariamente son da súa propiedade, ben de xeito directo ou ben a través de Urbaourense.
3. A Deputación Provincial de Ourense insta a Xunta de Galiza a consignar o orzamento preciso para esta infraestrutura no exercicio 2024.

7º.- MOCIÓNS DE URXENCIA.- Non se presentan.

8º.- ROGOS E PREGUNTAS.- Nesta quenda prodúcense as seguintes intervencións:

D.^a María Xosé Mangana Guede, do BNG, pregunta cal é o estado actual de execución da obra obxecto do expediente de contratación 99/POS/2022, entre os concellos de Cartelle e A Arnoia. Pide que se lle facilite ao seu grupo o acceso ao expediente de contratación.

D.^a Marina Vaz Quintillán, do Grupo Socialista, indica que no mes de maio as brigadas da Deputación estiveron executando obras por administración no Concello de Vilardevós e que a Deputación lle pasou unha liquidación ao concello por un importe de 24.000 euros polos

materiais empregados na dita actuación, Pide que se lles facilite un rexistro ou un informe das actuacións realizadas neste concello e que deron lugar á dita liquidación.

O **Sr. presidente** toma nota.

E, ás 18.00 horas, dáse por finalizada a reunión, redactándose a presente acta que se asinará electronicamente. Dou fe.